

Kerwerede 2016

Ehr leit, meer schreiwe des Johr ons,
des neie Johr im Johrfuffzisch,
also des Johr noch der grouße 850-Johr Feier fun unserm Ort!
Letschdt Johr des wor toll un wärklich foi,
ich gäi später nochmol dodruff oi,
unn des soll desjohr werrer sou soi,
äwwer alles, des was en jeder,
alles holt e bissel klenner.
Meer frahn uns das er do seid, meer sinn desjohr wärrer frieh,
dennoch wärd gefeiert, sou gut wie nie.
Willkumme in Hoamboch, im Rousedal,
gebt meer en Woi jetzt noch einmal,
kurz Musik, Humpa, donn gäits los,
hier fer eich uff de Stroß!
Prost!

So, in der Kerweredd gibst aach äh Protokoll,
des schreibt genau vor, wos ich soache soll (orrer muss).
Ich machs gern, denn do stäit drin,
es muss erwähnt wärrn,
wer die Leit do owwe alles sin.
Also ich fong om liebschde ou, mit unsre Fraue, des kann ich om allerbeschde
verdaue.
Vum Owwerdorf kimmt vun owwe draus

Als Begleiterin der Könischin,
die Saskia Albers, Halbdochter vom Willi Arnold,
do waas des ein jeder,
also des Owwerdorf iss werrer vertrete.

Beifall

Als negschdes, sie is debei, meer häwwe se aa,
des is die Bernadinis Anna,
des Enkelsche vum Schmitt, dem Friedel,
deshalb iss se immer sou fiedel,
des oanzische iss, des iss e bissel dumm,
die wohnt immer noch in unserm heißegeliebte Hepprum.

Beifall

Un zu aller guter letscht, eh Königin so allerbeschdt,
ich kenne sie wärklich nur,
fun allerfeinster schee Statur
die Elena ich bin sou frouh,
bleib aktiv unn weiter sou,
En grouße Applaus und des fürwahr,
iss unser goldisch Tilgers-Anna.

Jetzt unser Borsch,....
Ich du kurz winke,
denn ich muss kurz ebbes trinke!
Prost

Der Kerweborsch Nummer zwei,
iss moun Brurer Jan, der iss werer debei,
aus dem Hause Wipplinger-Weber,
ja, denn kennt aach werklich jeder.

Dezu kimmt aach desjohr, foi unn fit,
unsern liewe Liese-Philipp,
Der immer for en Spass debei, lange schon,
des iss de de Karin aus der Wäschingass ehrn Sohn.

Kerwekönigin:

Doch hold
Ich därf doch ah jetzt mol wos soche, (energisch)
ich will jo gar net arg long kloche,
iss mir jetzt ne Ehre uff die Schnelle,
unsern erschde Kerweborsch vorzustellen.
Meer sinn frouh uff unsern Jonas,
im Kerweredd lässe iss dess ein Ass,
meer merkt hold schnell jahrein jahraus,
der kimmt uff den Webers-Alfred, soin Großvadder raus,
der macht bei uns die beschde Dinger.
Unsern allerbeschde Jona Wipplinger!

Musik

Sou ich denk, isch kann jetzt ufonge die Redd zu redde!

Owwerhoamboch, eigentlich e rischdisch Idylle,
do dun bei meer die Alarmglocke schrille,
dem Lonnerts-Kurt, Gott hab ihn seelisch,
soi Heisel ging on en Auswärdische nehmlisch,
der iss, ich soags, en komische Kautz,
ja des soag ich hier frei raus
unn die arm Annche muss, des sinn koa Bosse,
obwohl se noch Wohnrecht hot,
alle Garteärwet sausse losse,
sogar des Voggelheisel im Gaade, hot der nei Besitzer,
aus Wolluschd oafach oabgerisse.
Donn hott er eh Fassung, bepflanzt mit Blumme,
oafach aus der Erd genumme,
unn des Ding, wies em efällt, on Meter grouß
oafach vor die Stroß gestellt.
Die Leit, wu vorbei gäihn, wäwwe gedenkt,
ich soag des werklich unverhemmt,
des wär jetzt, wie des aussieht,
ich kennt erbreche,
de neie Owerhoambecher Stadtaschebecher.!

Nix zum Trotz, es gäit weiter,
seid recht frouh unn immer heiter,
ich brauch holt jetzt, wie kennst onnerschd soi,
erschd emol e Gläsel Woi!

Musik

Vorsjohr wurd, ich wor nett froh,
koa oanzisch Wätschaft wor mäi do!
OB unser Rous und Adriana,
alle zwaa zu, wos e Drama!
Der Kneipenoutstand wurd ausgerufe, des wor zum Groine,
du hatteschd koa Wahl,
wo trink ich wos im Rousetal.
Die Schusters-Birgit aus de Rous,
gab jetzt ihrem Herz en Stouß,
und hot geschafft bei Doag und Nacht,
un hot die old „Rous“ uff Vordermann gebracht!
Grundrenovierung nennt meer dess, jetzt glänzt alles,
sou schee wie nie,
herzlichen Donk, liewie Schusters-Fämely!
Jetzt kann meer endlich wärrer, bin schun gonz versesse,
in Hoamboch en Woi trinke - unn äh halb Hähnsche esse.
Drum houch des Gloas, uff die Rous,
die Fraad is bei uns riesegroß,
jetzt braucht koaner mäi zu flenne,
wie hast es doch,
Doutgesoate läwe länger!

Eh scheni Feier gabs im März,
unser Netzers-Renate, des iss koan Scherz,
do greif ich meer doch on de Knorrn,
unser Ortsvorsteherin iss siebzisch worn.
Wos die gut Fraa sich rumgemoachd,
ob bei Doag un in der Noacht,
alles organisierd do im Rousetal,
sie iss hoalt allerbeschdi Wahl.
Ob im Ortsbeirat, orrer DRK,
unser Renate wor für alle da!
Jetzt säigt se sich, ach „Gott sei Doank“,
isch gäi jetzt in de Ruhestand!
Ich brauch mich niemäi rumzuqäle,
konn mit moim Enkelsche jetzt veel mäi speele.
Noch mols Glickwunsch Renate, du goldisch Grott,
jeder gratuliert do hier im Ort.
Dodruff du ich jetzt oner trinke,
du der Renate nochmol winke,
houch des Gloas, die Brie muss noi,
unn die Musik fällt jetzt oi!

Lied: **Happy Birthday**

Jetzt noch e Ding aus de Wasserschöpp,
ehr Leit, des wor aach sehr adrett,
denn es betrifft, dem Ex-Boimoschder Herbet soi Fraa,
die kennt ehr sicherlich aah.

Die wollt sich in ehre Bad,
ich soags beileibe,
blouß e mol die Fussnägel schneide.
Gesoagt getan, wunderbar,
alles wor ferdisch, des wor klar,
doch zum Schluss, des wor ein Graus,
kamm se nett mäi aus de Baddeer aus.

Die Deer die wor vehement,
die hot letztendlich stark gekemmt,
Die hot gerittelt un lammediert,
so gäits de Leit, denn sou wos bassiert.
Doch zum Glick, sie wurd gerettet,
vun ehre Monn, dem Gerhard Herbert.

Liewi Evelin, bleib mol gut druff,
irgendwonn macht deer jeder die Baddeer uff.

Uff den Schreck,
ich bin sou nett,
häib ich jetzt moi Gloas Woi,
ab dorch die Kehle,

Unser Steffen Schuster eremitierder Kerweborsch vun sellemols,
bei dem wor desjohr aach werrer wos los.

Ihm wor gar nett boange,
der Doag hot sou schee katt ougefonge,
nur hot er katte e Maleer,
die Zigarettshochtel, die wor leer.

Wupp ins Auto, zum Zigaretteautomat,
des Kloageld hot er sich zoammegespart,
doch die Fahrt wor ball zuende,
bei der Andrea Ochs-Kleber woll er wende,
unn hot, wies monche Leit geschieht,
die Kurv dort owwe nett gekriegt
unn knallt mim Auto, es musst holt sou soi,
bei de AOK in de Blummekiwwel noi.

Es wor bassiert, wos will meer mache,
denn kann meer repariern, denn sin nur Sache,
doch liewer Steffen, die Erkenntniss stellt sich oi,
sou deier kenne Zigaretteschoachte soi!

Prost!

Musik

Fahnenklau in Hambach

Ich reds jetzt aus äh bissel schneller,
des worn bestimmt fun driwwe - die Zeller!

Nochwos aus em Owwerdorf:

Ehr glaabt es gar net,

ich soags nur blouß, die Nochracht wor gonz scher zu dichte,
es wor mol werrer wos beis Russe-Mitsche!
Un debei wor, ich bin jo nett besoffe,
die Homels Inge aach betroffe, die wohnt do owwe uff de Stroß,
dort wu der Umzug gäit immer los.
Die Mitsche häwwe jo, die brauche veel Dinkel,
scheene große, ja scheene Hinkel.
Die laafe aach mol, demit doowwe iss wos los,
aach mol zu de Hoamels Inge,
do iss wendschdens im Owwerdorf wos los!
Die Autos basse immer uff,
doch jetzt kimmts, des iss koan Bluff,
do hot e Hinkel sich im Vorgarte fun de Inge wohlgesonne,
do wos gemitlich, wos eh Wonne,
des Vieh hot, des wor entzickt,
eh Ei aus ihrem Leib gedrickt.
Unn oabgeleigt, des wor foi,
direkt in Inges Vorgarde noi.
Dodriwwer wo die Inge froh,
die braucht jetzt koa Eier zu kaafe onnerschdwu.

Do fällt meer doch e Liedche oi,
des wolle meer bringe. Meer fonge ou jetzt gut zu singe:

Lied:

Ich wollt ich wär ein Huhn,
ich hätt nicht viel zu tun,
ich lege morgens mal ein Ei,

und Sonntags auch mal zwei!

Lied aus!

Zum Schluss will ich allen donke,
die ihre Freizeit geopfert häwwe ohne Schronke!
Also des letschd Johr Jubiläumsjahr,
des wor, muss ich soage, echt prima!
Meer mache weiter gut besonne,
schoint aach heit mol nett die Sonne!
Alles gut Ende gut,
ich holt for heit glei jetzt moi Schnut.
Ich wunsch eich all heit noch vee Spass,
in de Stroßekneipe un uff de Gass,
ferner noch ich soags ohne Hatz,
vell Spass uff unserm Rummelplatz.
Sou ehr Leit, des wors gewese,
die Kerweredd wurd vorgelese.
Doch oans noch korz beileibe,
liewer Nino, herzlich Donk for 10 Johr Kerwereddschreibe.

Es griëßt moll werer als ersde Wahl,
der Wuppi aus em Rousedal!

In diesem Sinne,
ab in die Rinne!

Wem ist die Kerwe!!“!!